

deleine de sainct Ioseph Amik<sup>8</sup>æian, tirée de leur Seminaire; Cette ieune femme fortit bien couuerte de leur maison, les Meres luy donnerent son petit ameublement; bien-toft apres elle donna des preuues d'vne foy viue & animée de la charité, estant aux trois Riuieres elle fut recherchée & follicitée de plusieurs ieunes hommes payens; mais sa constance les rebutta, & fit voir que Iesus-Christ a des graces plus fortes que la nature: comme elle vit que certains Jongleurs souffloient & chantoient vn sien frere malade, elle ne fit que pleurer: si tost qu'on eut chassé ces Charlatans, la pauvre enfant se mit à rire, témoignant par ses larmes l'horreur qu'elle auoit de leurs anciennes superstitions, & montrant par sa ioye le plaisir qu'elle prenoit de voir son frere dans les pensées d'auoir recours à Dieu. Elle porte le nom de la B. Mere Magdeleine de sainct Ioseph Carmelite, cette ame saincte honorée de Dieu par plusieurs miracles, a procuré sur la terre le dot du mariage de cette ieune Neophyte, ie ne doute nullement [9] qu'elle ne parle puissamment pour elle dedans les cieux, & pour ceux qui trauaillent en cette vigne, qu'elle a tant chérie.

Outre ces Seminaristes arrestées, nous en enuoyons d'autres passageres, vestuës à la Sauuage, qui demeurent quelque temps en cette petite maison, pour y estre instruites sur les Mysteres de nostre creance. Ces ieunes filles ayant pris quelque bonne teinture en cette Maison, s'en retournent par apres chés leurs parens. Quand ces bonnes Meres seront logées plus au large, elles auront encor vne autre occupation, les filles & les femmes qu'on voudra baptiser, iront passer quelque iours deuant leur baptesme en leur Monastere, pour y apprendre avec plus de repos la doctrine